

Excursiun informativa a Sogn Benedetg

da Norbert Berther

Sonda, ils 9 da zercladur 2018 ha il Forum cultural Tujetsch puspei realisau in'excursiun culturala e quei silla biala ucliva Sogn Benedetg sur Sumvitg. In bien tozzel personas ha fatg part da quella interessanta purschida e schau informar igl expert da leu, *Vitus Bass* davart la historia e la cultura da quei vitg.

Sin il crest prehistoric da 3000 onns all'entschatta dil vitg, oz numnaus Chic Surselva, cun ina bellezza survesta sin l'entira Surselva, retschevein nus in'informaziun generala e historica davart Sogn Benedetg. Ella vischinonza sesanfla la ruina dall'anteriura caplutta baghegiada el 13avel tschentaner e destruida igl unviern 1984, suenter biabein 700 onns, d'ina lavina vegnida giu dalla Val Mulineun. Sin iniziativa da Vitus Bass ei la ruina vegnida messa en uorden, aschia ch'ins ha in'idea co la baselgia vesev'ora. Sper la caplutta



Sin il crest prehistoric avon Sogn Benedetg declara Vitus Bass la situaziun historica e generala dil vitg.



Sogn Benedetg sur Sumvitg ei in bellezza uclaun. Enamiez il vitg croda la caplutta da Zumthor si.

ta ha existiu el 14avel tschentaner la claustra da beginas ella quala vivevan umens e femnas che se-dedicavan specialmein all'ascesa.- Baghegiar ina nova baselgia el medem liug han ins secapescha buca vuliu. Naven da quella ruina va la gruppa tuatschina encunter il vitg. Sin via savein nus admirar in anteriur mulin restaurau. Lu cuntinuein nus nossa spassegiada ed arrivein tier la nova caplutta construida 1988 tenor ils plans da Peter Zumthor. Ella ha la fuorma d'ina arca, ei construida da lenn – quei ch'ei in'excepciun per baselgias – e travestgida da slondas. Il sanctuari ei daventaus fetg renomau, el vegn frequentaus da numerus visitaders, specialmein digl art ed igl architect Peter Zumthor ha retschiert diversas distincziuns persuerter. Da temps en temps vegn fatg messa cheu e savens era festivau nozzas. Secapescha che nus vein era visitau quei edifeci nua che Vitus Bass ha dau in'interessanta informaziun. Sper la caplutta sesanfla in baghetg e vid las preits da quel ei pendiu si numerusa iseglia purila, dalla quala ei era avon maun egl intern dil baghetg. En in'otra casa dasperas ha Vitus Bass rimnau ed exponiu ulteriurs utensils dall'agricultura. Ei fa endamen il Museum Alpin da Curaglia da Gallus Giger che nus vein visitau avon enzacons onns.



La ruina dalla veglia baselgia da Sogn Benedetg dil 13avel tschentaner.



In maletg horribel aunc conservau ella caplutta destruida representa il giuvenes-sendi. Cheu ina copia, igl original sesanfla ella Claustra da Mustér ch'ei possessura dalla caplutta sco era dalla nova.

Suenter l'exkursiun havein gudiu in pign refrestg ell'ustria Miraval. Tuts eran incantai dalla buna purschida culturala, dalla quala Vitus Bass ei igl iniziants e realisatur! Ils iniziants dall'exkursiun, la suprastonza dil Forum cultural cun Tarcisi Hendry, André Schmid e Tumaisch Valier meretan in grond engraziament per quella interessanta purschida!



Egl intern dalla caplutta suondan ils visitaders las expectoraziuns da Vitus Bass. Il sanctuari vegn savens era duvraus sco liug da meditaziun.

Vid la preit d'in baghetg pendan da tuttas uisas iseglia che Vitus Bass ha rimnau.





Caplutta da Peter Zumthor ord da lenn travestgida da slondas en fuorma d'ina barca.



Ina paterlada ed in refrestg durant l'excursiun a Sogn Benedetg